

કરિંથ મંડળીલ પાઉલ પ્રેષિતનો લોખલાં બિજાં પત્ર પ્રસ્તાવના

કરિંથ લોકહાહાટી પાઉલા બિજા પત્રામાય પેલ્લા પત્રામાય સંબધિત કોઅલ્યો કોલહ્યોક વસ્તુહુવોય ચચા કોઅહે, બાકી નોવા મુદ્દા બી સંબધિત હેય, જેહેકોય પેલ્લા કરિંથ પત્રમાય વિસ્વાસી લોકહાન ચોકબીજાઆરે એકતામાય ઓઅના બારામાય આખહે, યા પત્રમાય પાઉલા મંડળીલ વિનાંતી કોઅયી કા ચ્યાઆરે ચ્યા સેવામાય બેગે ઓઅય જાય. બિજા કરિંથમાય હારી ખોબારે સેવા (અધ્યાય 2-5), પવિત્ર જીવનાહાટી પ્રોત્સાહન (અધ્યાય 6-7), એને દેઅના બારામાય નિર્દેશ (અધ્યાય 8-9). પાઉલાય ઈ પત્ર પેલ્લા કરિંથ લોકહાન લોખના ચોક વોરહા પાછે લગભગ 56 ઇસવી સન માય લોખ્યાં.

સલામ

1 આંય પાઉલ જો પોરમેહેરા ઇચ્છાથી ઈસુ ખ્રિસ્તા પ્રેષિત હેતાંવ, એને બાહા તિમોથિયુસાં તરફથી, ઈ પત્ર કરિંથ શેહેરામાય પોરમેહેરા જીં મંડળી હેય, એને આખાયા વિસ્તારા બોદા પવિત્ર લોકહાહાટી હેય.

2 આપહે પોરમેહેર આબહો એને પ્રભુ ઈસુ ખ્રિસ્ત તુમહેવોય સદા મોયા કોએ એને તુમહાન શાંતી દેતો રોય.

શાંતી પોરમેહેર

3 આપહે પ્રભુ ઈસુ ખ્રિસ્તા એને પોરમેહેર આબહા સ્તુતિ ઓએ, જો બોજ દયાળુ આબહો એને બોદેજ જાત્યે દિલાસાનો પોરમેહેર હેય.

4 પોરમેહેર આપહે બોદાજ દુઃખામાય દિલાસો દેહે એટલે બીજહાન દિલાસો દેય હોકજે, આમા ચ્યા જ્યા દુઃખામાયજ હેય ચ્યે રીતેથી દિલાસો દેય હોકજે, જેહેકેન પોરમેહેર આપહાન દિલાસો દેહે.

5 કાહાકા, જ્યે રીતે આમા ખ્રિસ્તા કોલહાક દુઃખાહામાય સહભાગી હેય, ચ્યેજ રીતે ખ્રિસ્તાથી આમહાન વોદારે દિલાસો મિળતો રોય.

6 જોવે આપા દુઃખ વેઠજેહો, તે ઈ તુમહે દિલાસા એને તારણાહાટી હેય એને આમા જો દિલાસો મેળાવજેહે, તે ઈ તુમહે દિલાસાહાટી હેય,

જ્યા પ્રભાવથી તુમા ધીરજથી ચ્યા દુઃખહાલ વેઠી લેતહૈ, જ્યાહાન આમા બી વેઠજેહૈ.

7 એને આમહે આશા તુમહે બારામાય મજબુત હેય, કાહાકા આમા જાંઅતેહે, કા જ્યે રીતે તુમા આમે દુઃખહામાય ભાગીદાર હેય, તેહેકેનુજ તુમા આમહે દિલાસામાયબી ભાગીદાર ઓઅહા.

દુઃખ થી બોચાવ્યા

8 ઓ બાહા એને બોઅયેહેય, આંય વિચારતાહાવ કા તુમા ચ્યા દુઃખહાબારામાય જાંઅ જીં આમહેવોય ચી પોડ્યા જીં આસિયા વિસ્તારામાય આમહાન વેઠાં પોડ્યા, ઓહડા બારી વોજા માય દાબાય ગીઅલાં આતા, જીં આમે સહન શક્તિથી બારે આતા, ઓલે લોગુ કા આમાહાય જીવતા રોઅનાબી આશા છોડી દેનેલ.

9 બાકી આમહાય પોતાના મોનામાય હોમજી લેદલા આતાં, કા આમા મોઅનારાજ હેજે, ઈ યાહાટી જાયા કા આમે પોતાનાવોય નાંય બાકી પોરમેહેરાવોય બોરહો મજબુત રાખે, જો મોઅલાહાન પાછો જીવાડેહે.

10 ચ્યાય આપહાન ઓહડા સંકાટા માઅરે બોચાડ્યા, એને બોચાડી, એને આમહાય ચ્યાવોય આશા રાખીહી, કા તો આગલાબી આમહાન બોચાડતો રોઅરી.

11 કાહાકા તુમા પોતાની પ્રાર્થનાથી આમે મોદાત કોઅતાહા, એટલે જીં વરદાન બો બોદહાથી આમહાન મિળી ચ્યા લીદે બો બોદા લોક આમહે તરફથી પોરમેહેરાલ ઘન્યવાદબી દેય.

ચોખ્ખાં રુદય

12 કાહાકા આમા ચોક વાતે વખાણ કોઅજેહે, કા આમહે અંતકરણ આમહાન બોરહો દેહે, કા આમહાય માઅહા આરે એને વિશેષ કોઇન તુમહે લોકહાઆરે આમહે વેવહાર પોરમેહેરાથી પવિત્ર એને હાચ્યાયે નુસાર આતો, જો લોકહા જ્ઞાનાનુસાર નાંય બાકી પોરમેહેરા સદા મોયા હાતે આતો.

13-14 આમા તુમહેહાટી કાયમ પત્ર લોખજેહે કા તુમા વાચી હોકે એને હોમજી હોકે. માન આશા હેય કા તુમા જીં વાત આમી વોછી હોમાજતેહે, ચ્યાલ પાછે પુરિરીતેકોય હોમજાહા એને તી વાત ઈ હેય

કા જ્યે રીતે તુમા આમહે પ્રભુ ઈસુ પાછા ચેયના દિહી આમહે વોખાણ કોઅહા, ચ્યેજ રીતે આમા બી તુમહે વોખાણ કોઅહુ.

મુસાફિર્યેમાય બદલાણ

15 માન બોરહો આતો કા તુમા લોક આમહાન હોમજાહા, યાહાટી આંચ તુમહેપાય યા માગતો આતો, એટલે તુમહાન મા તરફથી બેન મુસાફિર્યેહે લીદે ડબલ બોરકાત મીળે.

16 મા યોજના આતી કા આંચ તુમહે પાહિથી રોયન મોકોદુનિયા વિસ્તારામાય જાંઉ, એને પાછી મકોદુનિયા વિસ્તારથી પાછી ફિરીન ચેતાબી તુમહેપાય યાંવ. યા પાછે જોવે આંચ યહૂદીયા વિસ્તારા એછે મુસાફરી કોઅઉ તે તુમા માન મુસાફરીહાટી જરૂરી સામાન દેયને મા મોદાત કોએ.

17 તુમા પુછતા ઓરી કા માયે પોતાની યોજના કાહા બોદલી. કાય તુમહાન લાગહે કા માયે મા યોજનાયેલ નોકામ્થી બોનાડીહી? કાય તુમહાન લાગહે કા દુનિયા ચ્યા લોકહા હારકો હેય જ્યા “હા” આખતાહા, જોવે ચ્યા આસલીમાય મતલબ ઓઅહે “નાંચ”?

18 પોરમેહેરા હાચ્યાયે કસમ માયે તુમહાન જો સંદેશ દેનો, ચ્યામાય “હા” ને મતલબ હાં એને “નાંચ” ને મતલબ નાંચ ઓઅહે.

19 કાહાકા પોરમેહેરા પોહો ઈસુ ખ્રિસ્ત, જ્યા પ્રચાર સિલવાનુસ, તિમોથીયુસ એને માયે તુમહે વોચ્યે કોઅયો, તો પ્રચાર કોદહી “હાં” કા કોદહી “નાંચ” બાકી પોરમેહેરામાય કાયમ હાંજ રિયહો.

20 કાહાકા પોરમેહેરા જોલા વાયદા હેતા, ચ્યા બોદા ખ્રિસ્તામાય “હાં” હેય યાહાટી આમા પોરમેહેરા મહિમાયેહાટી ઈસુ ખ્રિસ્તથી આમેન બી આખતાહા.

21-22 પોરમેહેરુજ હેય, જો તુમહેઆરે આમહાન ખ્રિસ્તામાય મજબુત કોઅહે. પોરમેહેરે આમહેવોય ચ્યા સિક્કો મારીન બિયાના હારકા પોતાનો આત્મા આમહે રુદયામાય દેયને આમહે અભિષેક કોઅયોહો.

23 પોરમેહેર મા ચે હાચ્યાયે સાક્ષી હેય કા બીજેદા કરિંથ શેહેરામાય યાહાટી નાંચ ચેનો કા આંચ તુમહાન ઠોપકો દાં નાંચ માગતો આતો.

24 યા મતલબ ઈ નાંચ કા આમા તુમહે બોરહાવોય આમહે ઓદિકાર ચાલાડજે કાહાકા તુમા પોતાના બોરહામાય મજબુત ઉબલા હેતા. યાહાટી આમા તે તુમહેજ આનંદાહાટી તુમહેઆરે કામ કોઅનારા હેજે.

2

આપહે પ્રેમા બારામાય

1 માયે પોતાના મોનામાય નોક્કી કોઅય લેદેલ, કા આંચ તુમહાલ પાછા દુઃખ દાંહાટી તુમહેપાય તાં નાંચ યાઉ.

2 કાહાકા આંચ જો તુમહાન દુઃખ દેતહાવ, તે માન ખુશ કોઅનારો કાદો નાંચ ઓરી, ફક્ત તુમાંજ, જ્યાહાલ માયે દુઃખી કોઅયા.

3 માયે તુમહાન યે વાતેહાટી ઈ પત્ર લોખ્યાં, કા કાય એહેકેન નાંચ ઓએ, કા મા યેઅનાથી, જ્યાહાથી માન આનંદ મિળાં જોજે, આંચ ચ્યાહાથી દુઃખી ઓઉ. કાહાકા માન તુમા બોદહાવોય યે વાતે ખાત્રી હેય, કા જો મા આનંદ હેય, તોજ તુમહે બોદહાબી હેય.

4 માયે રુદયા કષ્ટ એને દુઃખા લીદે આહવેં વોવાડી-વોવાડીન તુમહાન ઈ પત્ર લોખ્યાહાં, માયે તુમહાન દુઃખ દાંહાટી ઈ પત્ર નાંચ લોખ્યાહાં, બાકી યાહાટી કા તુમા ઈ જાઈ જાં કા આંચ તુમહાન કોલહો વોદારે પ્રેમ કોઅતાહાંવ.

પાપ્યાહાન માફ કોઅના

5 જો ચોકતાંય દુઃખ દેનહા, તે ચ્યાય માન નાંચ, બાકી ચોક જાત્યા તુમહાન બોદહાન દુઃખ દેનહા, આંચ યા બારામાય યાથી વોદારે કાય આજુ નાંચ આખા માગુ.

6 ઓહડા માઅહાન જો ડોંડ તુમહેમાઅને કોલહાક વિસ્વાસ્યાહાલ દેનહો, તી પુરતાં હેય.

7 યાહાટી ઈ હારાં હેય કા તુમા ચ્યા ગુના માફ કોઆ, એને ચ્યાલ દિલાસો દા, નાંચ તે, કાય એહેકેન નાંચ ઓએ, કા તો બોજ દુઃખી ઓઇન પોતાના બોરહાલ પુરેરીતે નાકારી દેય.

8 યા લીદે આંચ તુમહાન વિનાંતી કોઅહુ, કા ચ્યાહાન દેખાડા કા તુમા આસલીમાય ચ્યાલ પ્રેમ કોઅતાહા.

9 માયે તી પત્ર યાહાટીબી લોખલાં આતાં, કાહાકા આંય ઈ પારખા માગતો આતો કા તુમા મા નિયમાહા પાલન કોઅહા કા નાંય.

10 જ્યાલ તુમા માફ કોઅતેહે ચ્યાલ આંયબી માફ કોઅતાહાંવ, કાહાકા માન માફ કોઅના જરુર પોડહે, તે આંય તુમહે ફાયદાહાટી ખ્રિસ્તા ઓદિકારાહાતે એહેકેન કોઅતાહાંવ.

11 કા સૈતાન આમહે કોઅહિબી પરિસ્થીતી ફાયદો નાંય ઉઠાવી હોકે, કાહાકા આમા હારેરીતે જાંઅજેહે કા ચ્યા યોજનાયો કાય હેય.

મોકોદુનિયા એછે જાઅના

12 જોવે આંય ખ્રિસ્તા હારી ખોબાર આખાહાટી ત્રોઆસ શેહેરામાય યેનો, એને પ્રભુય માન હારી ખોબાર આખાહાટી ચોક દોરવાજો ખોલી દેનો.

13 તેરંબી મા મોનાલ શાંતી નાંય મિળી, કાહાકા માયે મા આર્યો વિસ્વાસી બાહા તીતુસાલ તુમહેપાઅને હારી ખોબાર લેય ચેતો માન નાંય મિળ્યો, યાહાટી ત્રોઆસ શેહેરા વિસ્વાસ્યાહાથી છુટો પોડીન આંય તીતુસાલ હોદાહાટી મોકોદુનિયા વિસ્તારામાય પાછો ચેનો.

ખ્રિસ્તી સેવક-જીવના સુગંદ

14 બાકી પોરમેહેરા ઘન્યવાદ ઓઅય, જો ખ્રિસ્તમાય આમહે સબંધા લીદે, કાયમ આમહેહાતે ચાલહે એને આમહાન વિજય મેળવી દેહે, એને આમી તો આમહાન ચોક મીઠાં અતારા હારકા, બોદે જાગે ખ્રિસ્તા જ્ઞાનને ફેલાવાહાટી આમહે ઉપયોગ કોઅહે.

15 કાહાકા જ્યે તારણ પામી રીયહે એને જ્યે નાશ ઓઅય રીયહે યાહા વોચમાય આમા પોરમેહેરાહાટી ખ્રિસ્તા મધુર સુગંદ હેય.

16 જ્યે નાશ ઓઅય રીયહે, ચ્યાહાહાટી આમા મોરણા ગંધ, એને જ્યે તારણ પામી રીયહે ચ્યાહાહાટી જીવના સુગંદ. આસલીમાય, કાદોબી પોતે પોતાનાલ યા સુગંદાલ ફેલાવાં યોગ્ય નાંય હેય.

17 આમા ચ્યા બોદા લોકહા હારકા નાંય હેય, જ્યે મિલકાતેહાટી પોરમેહેરા વચના પ્રચાર કોઅતેહે, બાકી આમા પોરમેહેરા વચના પ્રચાર હાચ્યાયેથી એને ખ્રિસ્તા ઓદિકારાહાતે કોઅજેહે, એહેકોય જાઇન કા પોરમેહેર આમહાન એઅય રિયહો.

3

ખ્રિસ્તા જીવતા પત્ર

¹ કાય આમા પાછે પોતાના વાહવા કોઅરા લાગ્યે? કાય બિજા લોકહા હારકા આમા બી તુમહેથી કા તુમહેહાટી ભલામણા પત્રા જરુરી હેય?

² તુમા પોતેજ ચોક પત્રા હારકા હેય, જો બોદહા હામ્મે પોરમેહેરાહાટી આમહે કામહા ભલામણ કોઅહે, જી આમહે રુદ્યાવોય લોખલાં હેય, એને કાદાબી ચ્યાલ વાચી હોકહે એને તુમહે વોચમાય આમહે હારાં કામહાલ વોળખી હોકહે.

³ તુમા નોકકીજ ખ્રિસ્તા પાયને ચોક પત્રા હારકે હેય, એને ઈ પત્ર આમહે સેવાયે પરિણામ હેય. ઈ સોયેથી નાંચ કા દોગડા પાટ્યેવોય નાંચ બાકી જીવતા પોરમેહેરા આત્માકોય માઅહા રુદ્યરુપી પાટ્યેવોય લોખલાં ગીયહા.

પાઉલા ક્ષમતા

⁴ આમા એહેકેન ચાહાટી આખજેહે કાહાકા આમહાન ખ્રિસ્તાથી પોરમેહેરાવોય બોરહો હેય.

⁵ આમા ઈ નાંચ આખજે કા આમહેપાય પોતાનાથી કાયબી કોઅના ક્ષમતા હેય, બાકી પોરમેહેર આમહાન ઈ ક્ષમતા દેહે.

⁶ જ્યાંય આમહાન નવા કરારા સેવક ઓઅરા ક્ષમતાબી દેનહી, મૂસા નિયમાહા સેવક નાંચ બાકી પવિત્ર આત્મા, કાહાકા મૂસા નિયમાહાલ નાંચ પાળના પરિણામ મોરણ હેય, બાકી પવિત્ર આત્મા અનંતજીવન દેહે.

નવા કરારા મહિમા

⁷⁻⁸ જોવે મૂસા નિયમાહાલ દોગડા પાટ્યેવોય લોખ્યેલ, તોવે પોરમેહેરા મહિમા પ્રગટ ઓઅયેલ. ઈસરાયેલા લોક લાંબા સમયાલોગુ મૂસા મુંચાએછે એઅય નાંચ હોક્યા જોવેકા ઈ ચોમાક લાંબા સમય લોગુ નાંચ રિઅલી આતી. ચાહાટી મૂસા દેનલા નિયમાહા આધારાવોય કોઅલી સેવા મોરણા એછે લેય જાહાય, જ્યા ઓહડી મહિમા આતી, તે પવિત્ર આત્મા કામા મહિમા આજુ વોદારે રોઅરી.

9 જોવે ગુનેગાર ઠોરાવનારી સેવાયે મહિમા ઓહડી આતી, તે નોકકીજ નોવી સેવા જીં આમહાન ન્યાયી બોનાડેહે ચ્યા મહિમા યેથીબી વોદારે રોઅરી.

10 તી મહિમા જીં મૂસા નિયમાહાથી આતી, ચ્યે આમી કાય ચમાક નાંચ હેય, ચ્યે બોજ વોદારે મહિમા લીદે જીં નોવા કરારાથી યેહે.

11 કાહાકા જો મૂસા નિયમાહાથી ઓહડી મહિમા આતી, જીં વોછા સમયાહાટી બોની રોયી, તે નોવા કરારામાય કોલહી વોદારે મહિમા ઓરી જીં કાયમમાટે બોની રોહે.

12 યાહાટી ઓહડી આશા રાખીન આમા ઇંમાતથી બોલજેહે.

13 આમા મૂસા હારકે નાંચ, જ્યાંય પોતાના મુંચાવોય પોડદો ટાક્યેલ એટલે ઈસરાયેલા લોક ચ્યે ચમાકેલ જાખાં પોડતા એને પારવાતા નાંચ એએ.

14 બાકી ચ્યા કોઠાણ મોના ઓઅચા, કાહાકા આજેલોગુ જુના કરારા નિયમ વાયત્યે સમયે ચ્યાહા રુદ્યાવોય તોજ પોડદો પોડી રોહે, બાકી કેવળ ખ્રિસ્તાવોય બોરહો કોઅનાથીજ પોડદો ઓટાડલો જાહે.

15 એને આજ લોગુ જોવે મૂસા નિયમાહા ચોપડી વાયવામાય યેહે, તે ચ્યાહા રુદ્યાવોય પોડદો પોડલો રોહે એને યાહાટી ચ્યે ચાલ પુરીરીતે નાંચ હોમજેત.

16 બાકી જોવે કોદહીબી ચ્યે પ્રભુ ઈસુમાય બોરહો કોઅરી, તોવે તો પોડદો ઉઠી જાઅરી.

17 પ્રભુ તે આત્મા હેય, એને જાં કેસબી પ્રભુ આત્મા હેય તાં નિયમાહાથી છુટલા હેય.

18 બાકી જોવે આપા બોદા ચોકુ આરહા હારકા પોરમેહેરા મહિમાયેલ ઓહડા મુચહાલ દર્શાવતેહે જ્યાહાવોય પોડદો નાંચ પોડ્યહો, તે પોરમેહેર આમહાન વોદતી રોયલ્યે મહિમાયેમાય વોદારે ને વોદારે પોતાના હારકા બોનાડેહે, ઈ પ્રભુ કામ હેય, જીં પવિત્ર આત્મા હેય.

4

હારી ખોબારે ઉજવાડો

1 યાહાટી કા ઈ સેવા આમહાન પોરમેહેરા દ્યાથી મિળીહી, તોવે આમા કોવેજ ઈમાત નાંચ છોડજે.

2 બાકી આમહાય લાજવાના એને દોબલા કામહાલ છોડી દેનહા, એને નાંચ તે આમહે સ્વભાવામાય કોય જાત્યે ચાલાકી હેય એને નાંચ આમા પોરમેહેરા વચનાલ મિલાવટ કોઈન પ્રચાર કોઅજે. બાકી આમા પોરમેહેરા હામ્મે કેવળ હાચ્યાઇ દેખાડજેહે એને હર કાદો સાક્ષી દેય હોકહે કા ઈ હાચ્યાં હેય.

3 બાકી જીં હારી ખોબાર આમા પ્રચાર કોઅજેહે તી દોબલી હેય, તે ઈ નાશ ઓઅનારાહા હાટીબી દોબલી હેય.

4 યા દુનિયા દેવાય ચ્યા નાંચ બોરહો કોઅનારાહા મોનાલ આંદળા કોઅય દેનહા, એટલે ચ્યે ખ્રિસ્તા મહિમાયે હારી ખોબારે ચ્યા ચેનારા ઉજવાડાલ દેખી નાંચ હોક્યા, ખ્રિસ્ત પોરમેહેરા પ્રતિમા હેય.

5 કાહાકા આમા પોતાના નાંચ, બાકી ખ્રિસ્ત ઈસુ પ્રચાર કોઅજેહે, કા ઈસુ ખ્રિસ્ત પ્રભુ હેય, એને આમા ઈસુ લીદે તુમહે ચાકાર હેજે.

6 યાહાટી કા પોરમેહેરે આખ્યાં, “આંદારામાઅને ઉજવાડો ચમકે,” એને પોરમેહેરે ઉજવાડા હારકા આમે રુદ્યામાય હોમાજ દેની, એટલે આમા પોરમેહેરા મહિમાયેલ એઇ હોકજે, જીં ઈસુ ખ્રિસ્તમાય દેખાયેહે.

કાદવા વાહાણામાય મિલકાત

7 આમી આમહે રુદ્યામાય ઓ ઉજવાડો ચમકેહે, બાકી આમા પોતે કાદવા ચ્યા નાજુક વાહણાહા હારકે હેય જ્યાહામાય ઓ મોઠો ખજાનો બોઆલો હેય, યાથી ઈ ખોબાર પોડહે કા આમહે મહાન સામર્થ પોરમેહેરાપાઅને હેય, પોતાથી નાંચ.

8 આમા ચારે બાજુથી દુઃખ તે બોગાવજેહે, બાકી કોદહી આર નાંચ માનજે, ગાબરાજેહે તે નોકકી, નિરાશ નાંચ ઓઅજે.

9 સતાવલે તે જાતહે, બાકી નાકારલે નાંચ જાજે, પાડલે તે જાતહે, બાકી નાશ નાંચ ઓઅત.

10 આમા કાયામ પોતાના શરીરામાય ઈસુ મોરણાલ લેઈને ફિરજેહે, એટલે જીં કામ આમા કોઅજેહે ચ્યાથી લોક ઈસુ જીવનાલ એઅય હોકે.

11 કાહાકા આમા જીવતે હેજે સાદા ઈસુ લીદે મોરણા આથામાય રોજહે, કા ઈસુ જીવન બી આમે મોઅનારા શરીરમાય પ્રગટ ઓઅે.

12 યાહાટી આમા મોરણા આથામાય રોજહે, બાકી યા પરિણામ તુમહેહાટી અનંતજીવન ઓઅયાહા.

13 બાકી આમા પ્રયાર કોઅના ચાલુ રાખજેહે કાહાકા આમહેમાય તોહડોજ બોરહો હેય, જેહેકેન ગીતશાસ્ત્ર લોખનારામાય આતો, જોવે ચ્યાય આખ્યાં, “માયે પોરમેહેરાવોય બોરહો કોઅયો, યાહાટી માયે આખ્યાં,” યાહાટી આમહાયબી બોરહો કોઅયો યાહાટી બોલજેહે.

14 કાહાકા આમા જાંઅજેહે, જ્યાંય પ્રભુ ઈસુલ મોઅલાહામાઅને પાછો જીવાડ્યો, તોજ આમહાનબી ઈસુમાય ભાગીદાર હેય ઈ જાઇન પાછો જીવાડી, એને તુમહેહાતે પોતાના હામ્મે ઉબારાંહાટી આમહાન તુમહેઆરે લેય યેઅરી.

15 કાહાકા અ્યે બોદે દુઃખે જ્યે આમહાય સહન કોઅયે તુમહેહાટી હેય, એટલે જેહેકેન પોરમેહેરા સદા મોયા વોદારે ને વોદારે લોકહાન ખ્રિસ્તાપાય લેય યેહે, અ્યેજ રીતે પોરમેહેરા મહિમાહાટી ધન્યવાદા પ્રાર્થના કોઅનારા લોકહા આકડોબી વોદતો જાય.

16 યાહાટી આમા ઈમાત નાંય આરજે, જો આમે બારેના મનુષ્યત્વ નાશબી ઓઅતો જાહે, બાકી આમહે આત્મા દિહે-દિહે નોવો ઓઅતો જાહે.

17 કાહાકા આમહે વર્તમાના મુશીબાત્યો હાન્યો હેત્યો એને બોજ લાંબા સમયાલોગુ નાંય રોઅરી, બાકી યાહા પરિણામ અનંત મહિમા રોઅરી જીં અ્યે બોધેહેથી બોજ વોદારે ઓઅરી જ્યે આમા વિચાર કોઅય હોકજેહે.

18 આમહાય આમહે દિયાન ચ્યાવોય નાંય કોઅયા, જીં દેખાયેહે બાકી ચ્યાવોય, જીં દેખાય નાંય. કાહાકા જીં કાય દેખાયેહે, તી ગેડી બોયજ હેય બાકી જીં દેખાય નાંય તી અનંતકાળા હેય.

5

આમહે હોરગ્યા ગુઉ

1 કાહાકા આમા જાંઅજેહે, કા આમહે શરીર યે દોરત્યેવોય તંબુ હારકા હેય, જ્યામાય આમા રોજહે, જોવે તી નાશ ઓઅય જાઅરી, તે આમહાન પોરમેહેરા પાયને હોરગામાય ચોક ઓહડા ગુઉ મિળરી, જ્યાલ ચ્યાય પોતે આથેકોય બાંદલા હેય એને તી અનંતકાળ લોગુ રોઅરી.

2 યાહાટી આમા યા શરીરામાય કાંહાજેહે એને મોઠી આશા રાખજેહે, કા આમહાન યોક ઓહડા શરીર દેય, જું આમે યા હોરગ્યા ગોઆ હારકા રોય.

3 જ્યાલ આમા પોવજે તે આમા નાગે નાંય રોય જાજે.

4 આમા યા શારીરિક શરીરમાય રોતી વોખાત વોજાથી દાબાયન હાઆ ટાકજેહે, કાહાકા આમા યા શારીરિક શરીરાલ છોડા નાંય માગજે બાકી આમા જાંઅજેહે કા પોરમેહેર આમહાન હોરગ્યા શરીર દેય, એટલે આમહે ઈ શરીર જું મોઅઇ જાઅરી, એને અનંતજીવનામાય બોદલાય જાજે.

5 એને જ્યે આપહાન યા નોવા શરીરાહાટી તિયાર કોઅયાહાં તો પોરમેહેર હેય, જ્યે આપહાન બિયાના હારકા પવિત્ર આત્માબી દનહા.

6 યાહાટી આમા ઇંમાતથી રોજહે એને ઈ જાંઅજેહે, કા જાંવલોગુ આમા યા શરીરામાય રોજહે, તાંઉ આમા હોરગા થી દુઉ રોજહે, જાં પ્રભુ રોહે.

7 કાહાકા આમા ચ્યાવોય બોરહો કોઅવાથી જીતહયા, ચ્યાલ એઅવાથી નાંય.

8 યાહાટી આમા ઇંમાતથી રોજહે, એને આમહાન ગોમહે કા મોઅના પાછે યા શરીરાલ છોડીન પ્રભુવા આરે પોતાના ગોઅમે રોજે.

ખ્રિસ્તા ન્યાય કોઅના જાગો

9 યાહાટી આમહે આશા ઈ હેય, કા જો ઈહીં દોરત્યેવોય કા જો આમા ચ્યા હાતે હોરગામાય રોજે, બાકી આમા ચ્યાલ ગોમતે રોજે.

10 કાહાકા ઈ જરૂરી હેય કા આમા બોદે ખ્રિસ્તા ન્યાયાસના હામ્મે ઓજૂર ઓઅજે કા દરેકાલ શારીરિક શરીરાથી કોઅલા હારાં કા ખારાબ કામ કોઅયા ઓરી ચ્યાનુસાર ચ્યાલ ફળ મીળે.

પોરમેહેરાઆરે મેળમિલાપા સેવા

11 યાહાટી પોરમેહેરા દાક રાખીન, આમા લોકહાન હાચ્યાયેવોય બોરહો કોઅરાહાટી વિનાંતી કોઅજેહે. પોરમેહેર આમહાન પુરેરીત્યેકોય જાંઅહે, આંય આશા કોઅતાહાંવ કા તુમહે મોનામાયબી આમહાન હારેરીતે જાંઅતાહા.

12 આમા તેરુંબી પોતાની વાહવા તુમહે હામ્મે નાંય કોઅજે બાકી આમા વિચારજેહે કા તુમહાન આમહેવોય વાહવા કોઅના કારણ મીળે,

કા તુમા ચ્યાહાલ જાવાબ દેય હોકે, જું રુદયા વાતે વોય નાંય, બાકી દિખાવટયે વાતેહેવોય વાહવા કોઅતેહે ચ્યાહાન તુમા જાવાબ દેય હોકે.

13 જો કાદાં આખહે કા આમા ગાંડા હેય, તે ઈ પોરમેહેરાહાટી હેય, એને જો આમહે દિમાક ઠિકાણે હેય તે ઈ તુમહેહાટી હેય.

14 કાહાકા ખ્રિસ્તા પ્રેમ આમહાન કોબજામાય કોઅહે, યાહાટી આમા મજબુત હેય, કા જોવે ચોક માઅહું બોદા લોકહાહાટી મોઅઇ ગીયો, યાહાટી બોદે માઅહે મોઅઇ ગીયે.

15 એને ખ્રિસ્ત યા લીદે મોઅયો, કા જ્યે જીવતે હેય, ચ્યે આગલા પોતાલ ખુશ કોઅરાહાટી નાંય જીવે, બાકી ચ્યાહાહાટી જીવે જો ચ્યાહાહાટી મોઅયો એને જ્યાલ પોરમેહેરે મોઅલાહામાઅને પાછો જીવતો કોઅયો.

ખ્રિસ્તામાય નવા જીવન

16 યાહાટી આમી આમા કાદાલબી દુનિયા નોજારેકોય નાંય એઅહું, એને આમહાય પેલ્લા ખ્રિસ્તાલ દુનિયા નોજારેકોય એઅયા, બાકી આમીને આમા એહેકેન નાંય કોઅજે.

17 યાહાટી જો કાદો ખ્રિસ્તામાય બોરહો કોઅહે તે ચ્યાલ ચોક નોવો સ્વભાવ મિળહયો, જુનો સ્વભાવ જાતો રોયહો, એને આમી નોવો સ્વભાવ સુરુ ઓઅય ગીયહો.

18 એને બોદો વાતો પોરમેહેરા પાયને હેય, જ્યાંય ખ્રિસ્તાથી પોતાના હાતે આપહે મેળમિલાપ કોઅય લેદો, એને મેળમિલાપા સેવા આમહાન હોઅપી દેનહી.

19 યા મોતલાબ ઓ હેય કા પોરમેહેરે માઅહા પાપહા દોષ ચ્યાહાવોય નાંય ગોણાતા ખ્રિસ્તાથી પોતાના હાતે દુનિયા મેળમિલાપ કોઅય લેદો, એને યા મેળમિલાપા સંદેશા પ્રચારા સેવા આમહાન હોઅપી દેનહી.

20 યાહાટી આમા ખ્રિસ્તા એલચી હેજે, માના પોરમેહેર આપહેથી લોકહાન ચ્યા સંદેશ માની લાંહાટી બળજબરી કોઅય રિયહો, આમા ખ્રિસ્તાથી લોકહાન વિનાંતી કોઅજેહે, કા પોરમેહેરાઆરે મેળમિલાપ કોઅય લા.

21 ખ્રિસ્ત જો પાપ વગર આતો, ચ્યાલ પોરમેહેરે આમહેહાટી પાપ કોઅઇ દેનો, એટલે આમા પોરમેહેરા નોજરેમાય ન્યાયી બોની હોક્યે કાહાકા ખ્રિસ્તાય આમહે પાપહા ડોંડ લેય લેદો.

6

સેવામાય અનુભવ

1 પોરમેહેરાઆરે કામ કોઅના લીદે આમા તુમહાન ઇબી વિનાંતી કોઅજેહે, કા પોરમેહેરા જીં સદા મોયા તુમહાન મીળહી, એલ નોકામ્પી મા જાં દાહા.

2 કાહાકા નિયમશાસ્ત્રામાય પોરમેહેર આખહે, “હાચ્યાં સમયે આંય તો વોનાયો, એને તારણા દિહી માયે તુલ મોદાત કોઅયી,” વોનાયા, આમી હાચ્યો સમય હેય, વોનાયા, આમી તારણા દિહી હેય.

પાઉલા દુઃખે

3 પોરમેહેરાઆરે કામ કોઅનારા હેજે, યા લીદે આમા કોઅયેહેબી વાતમાય કાદાલ ઠોકર ખાઅના મોકો નાંય દેજે, કા આમહે સેવાયેવોય દોષ નાંય યેય.

4 બાકી બોદયે રીત્યેથી, આમા દેખાડજેહે કા આમા પોરમેહેરા સેવાક હેજે, ધીરજથી આમા મુશ્કેલી, આબદા, એને દુઃખ સહન કોઅજેહે.

5 આમહાન ચાપકાહાકોય માર દેનો, જેલેમાય ટાક્યા, આમહાન ગીરધેમાય તકલીફ દેની, આમહાય બોજ વોદારે મેઅનાત કોઅયી, આમા આખી રાત-રાતબોય જાગતા એને બુખા રિયા.

6 આમહાય ચોખ્યે રીતેથી, જ્ઞાનથી, ધીરજથી, કૃપાળુતાથી, પવિત્ર આત્મા નિષ્કપટ પ્રેમા અનુસરણ કોઇન,

7 હાચ્યાયે પ્રચાર ને પોરમેહેરા સામથ્યા થી ન્યાયપણા આથ્યારથી આમહાય નાંય કેવળ પોતાનીજ હાંબાળ કોઅયી, બાકી હમલોબી કોઅયો.

8 માનપાન, એને અપમાન, વાહવા એને નિંદા, ઈ બોદા આમહાન મિળ્યાં, આમહાન કપટી ગોણ્યા, બાકી આમા હાચ્યાં બોલજેહે.

9 કોલહાક લોક આમહાન જાંઅતાહા-વોળાખતાહા, તેરુંબી કોલહાક લોક આમહાન અજાણ્યા માનતાહા, આમા મોઅલા ગોણલા

જાજહે એને તેરુંબી જીવતા હેજે, આમા માર ખાજહે, બાકી મોઅજે નાંય.

10 આમા દુઃખી હેજે, તેરુંબી આમા હર સમયે આનંદિત હેય, આમા પોતે તે કંગાલ હેય બાકી બીજહાન આત્મિકરીતેથી માલદાર બોનાવી દેજહે. એહેકેન હેય જહેકેન આમહેપાય કાય નાંય તેરુંબી બોદા કાય હેજે.

11 ઓ કરિંથ શેહેરા વિસ્વાસ્યાહાય, આમહાય મુંય ખોલીન તુમહાન વાતો કોઅયો આમા તુમહાન પુરા રુદ્યાથી પ્રેમ કોઅજેહે.

12 આમા પોતાના પ્રેમાલ તુમહેહાટી વોછો નાંય કોઅજે, બાકી તુમા તુમહે પ્રેમાલ આમહેહાટી વોછો કોઅય રીયહા.

13 તુમહાન મા પાહા હોમજીન આંય તુમહાન આખતાહાવ, કા તુમાબી ચ્યા બોદલામાય આમહાન પુરા રુદ્યાથી પ્રેમ કોઆ.

આમા પોરમેહેરા મંદિર હેય

14 નાંય બોરહો કોઅનારાહા આરે એકતામાય ઓઅના કોશિશ મા કોઅહા, કાહાકા ન્યાયપણા એને ખારાબ કામહા કાયજ તાળમેળ નાંય હેય, એને ઉજાળાં એને આંદારાંબી પુરે રીતેથી આલાગ હેય.

15 ખ્રિસ્ત એને સૈતાના કાયજ સબંધ નાંય હેય, યાહાટી બોરહો કોઅનારા નાંય બોરહો કોઅનારા આરે કાયજ સંગતી નાંય હેય.

16 પોરમેહેરા દેવાળામાય મુર્તિહી કાયજ જાગો નાંય હેય. કાહાકા આપા તે જીવતા પોરમેહેરા દેવાળા હેજે, જહેકેન કા પોરમેહેરે પવિત્રશાસ્ત્રમાય આખ્યાહા, “આંય ચ્યા લોકહા મોનામાય રોહીં એને ચ્યાહાઆરે ચાલહીં, એને આંય ચ્યાહા પોરમેહેર ઓઅહીં, એને ચ્યા મા લોક ઓઅઈ.”

17 યાહાટી પ્રભુ આખહે જ્યા લોક, પોરમેહેરા વચનાપ્રમાણે નાંય ચાલે ચ્યાહાથી આલાગ રા, “તુમા ચ્યા લોકહા વોયમાઅને બારે નિંગી યા એને અશુદ્ધ વસ્તુલ મા આથલાહા, તે આંય, તુમહાન સ્વીકાર કોઅહી.

18 આંય તુમહે આબહો બોનહી, એને તુમા મા પોહા એને પોહયો બોનહા, ઈ સર્વશક્તિમાન પ્રભુ પોરમેહેરા વચન હેય.”

7

1 ઓ પ્રિય બાહા એને બોઅયેહેય, કાહાકા પોરમેહેરે આપહાન પોતાના પોહહા હારકા સ્વીકાર કોઅરાહાટી યે રીતે વાયદો કોઅયોહો, તે યા, આપા પોતાના શરીર એને આત્મા બોદા મેલાપણા ચોખ્ખાં કોઅતે, એને પોરમેહેરા દાક રાખીન પુરીરીતેથી ચોખ્ખાં જીવન જીવા કોશિશ કોઆ.

આનંદ એને મોન બોદાલના

2 આમહાન પોતાના પુરા રુદયાથી પ્રેમ કોઆ, આમહાય નાંચ કાદા આરે ખોટાં કોઅયાહાં, નાંચ કાદા બગાડયાહા, એને નાંચ કાદાલ છેતર્યાહા.

3 આંચ તુમહાન દોષી ઠોરવાહાટી ઈ નાંચ આખું, કાહાકા આંચ પેલ્લોજ આખી ચુકયોહો, કા આમા તુમહાન પુરા રુદયાથી પ્રેમ કોઅજેહે, એને પ્રેમ કોઅતા રોહુ, ભલે કાયબી ઓઅય જાય.

4 આંચ તુમહાન પુરા બોરહાથી આખી રિયહો, આંચ તુમહે વાહવા કોઅહુ, માન બોજ દિલાસો મિળ્યો એને બોદેજ મુશ્કીલ્યેહેમાય, આંચ આનંદાકોય બોઆલો રોતાહાંવ.

5 કાહાકા જોવે આમા મોકોદુનિયા વિસ્તારામાય યેના, તોવેબી આમે શરીરાલ આરામ નાંચ મિળ્યો, બાકી આમા ચારી ચોમખીને મુશ્કીલ્યો વેઠતા આતા, આમહે ચારીચોમખી જગડા કોઅતા આતા, એને આમહે રુદયામાય બિઠ આતી.

6 તેરુંબી નિરાશ લોકહાન દિલાસો દેનારો પોરમેહેરે તીતુસા યેવાથી આમહાન દિલાસો દેનો.

7 એને કેવળ ચ્યા યેવાથીજ નાંચ, બાકી ચ્યા દિલાસાથીબી, જીં તીતુસાલ તુમહેપાઅને મિળ્યેલ. ચ્યાય માન માંહાટી તુમહે આશા, એને દુઃખ એને માંહાટી તુમહે દેખભાલે ખોબાર આમહાન વોનાડયો, જ્યાથી માન વિશેષ આનંદ જાયો.

8 માન યે વાતે અફસોસ નાંચ આતો કા માયે તુમહાન તી પત્ર લોખ્યાં, ભલે ને યાય તુમહાન દુઃખી કોઅયા ઓરી, જેહેકેન માન પેલ્લીવાર દુઃખી ઓઅયો, કાહાકા માયે દેખ્યાં કા યાથી તુમહાન વોછા સોમયાહાટી દુઃખી કોઅય દેનહા.

9 બાકી આમી આંચ આનંદામાય હેતાંવ, યાહાટી નાંચ કા તુમહાન દુઃખી કોઅયા, બાકી યાહાટી કા તુમહાય ચ્યા દુઃખી ઓઅવાથી પાપ કોઅના બંદ કોઅય દેના. તુમહાય ચ્યા દુઃખાલ પોરમેહેરા ઇચ્છા નુસાર માની લેદા એને યે રીતે તુમહાન આમહેપાઅને કોઅયેહેજ વાતે નુકસાન નાંચ ઓઅયા.

10 જો કાદાં માઅહું પોરમેહેરા ઇચ્છા નુસાર દુઃખ માની લેહે, તે તો પાપ કોઅના બંદ કોઅય દી એને તો તારણ મેળવી, ઈ કાય દુઃખા વાત નાંચ હેય. બાકી દુનિયા દુઃખ અનંત મોરણા એછે લેય જાહાય.

11 આમી એઅયા, તુમહાય જું દુઃખ પોરમેહેરા મોરજી નુસાર માની લેદા, ચ્યાય તુમહેમાય કાય-કાય બોદલાણ કોઅયોહો, ઓહડો આનંદથી બોરાલો તત્પરતા, પોતાનો પક્ષ ચોખ્ખી કોઅના ઓહડી મોઠી મોરજી, અન્યાયા પ્રતિ ઓહડો ગુસ્સો, મુશ્કીલ્યે પ્રતિ ઓહડી સાવધાની, માન બેટ કોઅના ઓહડી તેજ મોરજી, સેવાયે પ્રતિ ઓહડો આનંદ એને દુરાચાર્યાહાન ડોંડ દાંહાટી ઓહડયે તેજીથી તુમહાય ઈ સાબિત કોઅય દેના કા બોદાંજ ઠીક-ઠાક કોઅનામાય તુમહાય કાયબી બાકી નાંચ છોડયા.

12 બાકી ઈ પત્ર માયે નાયતે તુમહાન યાહાટી લોખ્યાં કા માન ચ્યા કાળજી આતી, જું અન્યાય કોઅહે એને નાંચ કા ચ્યાહાટી, જું અન્યાય સહન કોઅહે બાકી યાહાટી કા પોરમેહેરા હામ્મે ખુદ તુમાંજ ઈ એઅઇ લા કા તુમા આમહે પ્રતિ કોલહા હાચ્યાં હેય.

13 યાથી આમહાન દિલાસો મિળ્યો, એને આમહે યા દિલાસાહાતે આમા તીતુસા આનંદાલ એઇન આજુબી આનંદિત જાયા, કાહાકા તુમહે બોદહાથી ચ્યાય નોવી તાજગી મેળવિહી.

14 કાહાકા જો માયે તીતુસા હામ્મે તુમહેવોચ અભિમાન દેખાડયોહો, તે માન ચ્યાહાટી લાજવાયા નાંચ પોડ્યા. જ્યેં પરમાણે, જું માયે તુમહાન આખ્યાં તી હાચ્યાં આતા, ચ્યેજ પરમાણે તીતુસા હામ્મે મા અભિમાન કોઅના બી હાચ્યાં સાબિત જાયા.

15 જોવે તો યાદ કોઅહે કા તુમા બોદે આજ્ઞા પાળનારે આર્તે એને તુમહાય કોલહાક બિઅતા એને કાપતા ચ્યા સ્વાગત કોઅયા, તોવે ચ્યા જો પ્રેમ તુમહે પ્રતિ આજુ વદારે વોદી જાહાય.

16 આંય પુરે રીતેથી તુમહાવોય બોરહો કોઅતાહાંવ, યાથી આંય આનંદિત હેતાંવ.

8

ઉદારતાથી દાન દેયના

1 આમી ઓ બાહાહાય એને બોઅયેહેય મોકોદુનિયા વિસ્તારા મંડળેહે વિસ્વાસ્યાહાવોય, આમા તુમહાન પોરમેહેરા ચે સદા મોયા ખોબાર દેજહે, ચ્યા બારામાય આંય તુમહાન આખા માગહુ.

2 જોવે ચ્યાહા બોજ બોદી મુશ્કીલીયહેથી પરીક્ષણ જાયા, તે ચે બોજ ખુશ આર્તે, ચે બોજ ગોરીબ આર્તે બાકી ચ્યાહાય બિજા વિસ્વાસ્યાહા મોદાત કોઅરાહાટી બોજ ઉદારતાથી પોયહા દેના.

3 એને ચ્યાહાય પોતાના શક્તિનુસાર, બાકી ચ્યાથીબી વોદારે, પોતાના મનથી દાન દેનહા ચ્યાહા બારામાય મા ઈ સાક્ષી હેય.

4 ચ્યાહાય તે વિનાંતી વોય વિનાંતી કોઇન પોરવાનગી માગ્યી કા ચ્યાહાય ચેરસાલેમમાય સંત લોકહાન મોદાત કોઅયો ધન્યતામાય ભાગીદાર ઓઅના હારો મોકો મેળાવલો જાય.

5 એને ઈ બોદા આમહે આશાયેથીબી વોદારે આતાં, ચ્યાહાય બોદહા પેલ્લા પોતાલ પ્રભુહાટી એને પાછે પોરમેહેરા ઇચ્છાથી આમહેહાટી હોઅપી દેના.

6 યાહાટી આમહાય તીતુસાલ વિનાંતી કોઅયી, કા જેહેકેન ચ્યાય પેલ્લી શુરવાત કોઅયેલ, તેહેકેનુજ તુમહે વોયમાય યા દાનાં કામાલ પુરાં બી કોઅે.

7 બાકી જેહેકેન બોદયે વાતમાય એટલે બોરહો, વચન, જ્ઞાન એને બોદીજ જાત્યે યત્નમાય, એને ચ્યા પ્રેમામાય જો આમહાવોય રાખતાહા, વોદતા જાતહા, તેહેકેનુજ ગરીબ વિસ્વાસ્યાહાલ દાન દેયના કામાંમાયબી વોદતા જાં.

ખ્રિસ્ત આમહે નમુનો હેય

8 આંય ચે બાબતમાય કાય આગના તે નાંય દેય રિયહો, બાકી બિજા લોકહા આનંદા દાખલો દેયને આંય તુમહે પ્રેમા હાચ્યાયે પરીક્ષા લાં માગહુ.

9 તુમા આમહે પ્રભુ ઈસુ ખ્રિસ્તા સદા મોયા જાંઅતાહા, કા તો માલદાર આતો તેરુંબી તુમહેહાટી ગોરીબ બોન્યો, યાહાટી કા ચ્યા ગોરીબ ઓઅવાથી તુમા માલદાર ઓઈ જાય.

10-11 ગીયા વોરહામાય તુમા કેવળ દાન દેઅનામાય પેલ્લે આર્તે બાકી ઓહડા કોઅરાબી ઇચ્છા રાખનામાય પેલ્લે આર્તે, ઈહીં મા સલાહા હેય કા યા મામલામાય તુમહેહાટી બોદહાથી હારાં કાય હેય, આમી જીં કામ તુમહાય સુરુ કોઅયાહાં, ચ્યાલ પુરાં કોઆ, તુમા યાલ પુરાં કોઆહાટીબી ઓલાંજ ઉત્સુક બોની રા, જોલા તુમા ચ્યાલ સુરુ કોઅના સમયે આતા.

12 કાહાકા જો કાદામાય દાન દેઅના ઇચ્છા હેય તે જીં કાય ચ્યાપાય હેય, ચ્યા આધારાવોય ચ્યા દાન માન્ય ઓઅરી, નાંય કા ચ્યા આધારાવોય, જીં ચ્યાપાય નાંય હેય.

13 આંય નાંય વિચારુ કા બિજા લોકહા જરુરતમાય મોદાત કોઅના લીદે તુમહે પોતાના જીવન કઠીણ બોની જાય, બાકી બોદહા જીવન યોક હારકા રા જોજે.

14 યે સમયે તુમહેપાય બો બોદા હેય ચ્યાથી જ્યાહાન જરુરી હેય ચ્યાહાન પુરાં કોઆ, એટલે યેનારા સમયામાય ચ્યાહાપાયબી બો બોદા વોદી જાય ચ્યાથી તુમહે જરુરતો પુરી કોઅય, તોવે બેની હારકા ઓઅય જાય.

15 જેહેકેન કા પવિત્રશાસ્ત્રમાય લોખલાં હેય, “જ્યાહાય વોદારે યોખઠા કોઅયા ચ્યાહા કાય વોદારે નાંય નિંગ્યા એને જ્યાહાય વોછા યોખઠા કોઅયા ચ્યાહાલ કાય ખોટ નાંય પોડી.”

તીતુસાલ કર્ણિથમાય દોવાડના

16 પોરમેહેરા ધન્યવાદ ઓઅે, જ્યાંય તીતુસા રુદ્યામાય ચ્યાજ વિચાર ટાક્યા જ્યા માન તુમહેહાટી હેય.

17 જોવે આમહાય ચ્યાલ તુમહાન મિળાહાટી આખ્યાં, તે ચ્યાય આમહે વિનાંતી સન્માન કોઅયો, એને તો ઉત્સાહાથી પોતાની ઇચ્છાથી તુમહેપાય યાહાટી તિયાર જાયો.

18 એને આમા ય્યાઆરે યોક આજુ વિસ્વાસી બાહાલ દોવાડી રીયહા, જો બોદી મંડળ્યેહે વિસ્વાસ્યાહામાય હારી ખોબારે પ્રચારાહાટી માનાપાના ઓઅતી જાહાય.

19 એને ઓલાહાંજ નાંય, બાકી તો મંડળ્યે વિસ્વાસ્યાહાથી ઠોરાવલોબી ગીયો, કા યા દાનાં કામાહાટી આમહે આરે જાય એને આમા ઈ સેવા પ્રભુ મહિમા એને ઈ દેખાહાટી કોઅજેહે, કા આમા ચેરૂસાલેમમાય વિસ્વાસ્યાહા મોદાત કોઅરાહાટી આમા ઉત્સુક હેજે.

20 આમા તીતુસાઆરે ય્યા વિસ્વાસી બાહાલ દોવાડીન ચે વાતમાય હાયવીન હેજે, કા યા ઉદારતા કામાવિષાય માય જ્યા સેવા આમા કોઅજેહે, કાદો આમહાવોય દોષ નાંય થોવે.

21 કાહાકા જ્યો વાતો કેવળ પ્રભુવા નોજરેમાયજ નાંય, બાકી માઅહા નોજરેમાયબી હારી હેય, આમા યે વસ્તુહુલ હારિરીતે કોઅરાહાટી પોતે દિયાન દેજહે.

22 એને યા હાતે યોક આજુ વિસ્વાસી બાહાલ દોવાડી રીયહા, જ્યાલ આમહાય બોજદા પારખ્યોહો એને તો હાચ્યો માલુમ પોડ્યોહો. બાકી આમી તુમાહાવોય ય્યા મોઠો બોરહો હેય, યા લીદે તો આજુબી વોદારે આનંદામાય હેય.

23 જો કાદો તીતુસા બારામાય પુછે, તે તો મા આર્થો, એને તુમહેહાટી મા હાંગાત્યો હેય, એને જો આમે વિસ્વાસી બાહાહા બારામાય પુછે, તે ય્યા મંડળ્યેહે દોવાડલા એને ય્યા ખ્રિસ્તાહાટી માનપાન લેય ચેતહા.

24 યાહાટી તુમા ય્યાહાન તુમહે પ્રેમ દેખાડા એને મંડળ્યે વિસ્વાસ્યાહા હામ્મે ઈ સાબિત કોઆ કા આમે તુમહેવોય વાહવા કોઅના હાચ્યાં હેય.

9

મોદાત કોઅના અગુવાઈ

1 આમી ચેરૂસાલેમમાય વિસ્વાસ્યાહાન પોયહા દેઅના સેવાયે બારામાય, માન તુમહાન લોખના કાય જરૂરત નાંય હેય.

2 કાહાકા આંય તુમહે દાન દેઅના ઇચ્છા જાંઅતાહાંવ, જ્યા લીદે આંય તુમહે બારામાય, મોકોદુનિયા વિસ્તારા વિસ્વાસ્યાહા હામ્મે વાહવા દેખાડુહું, કા તુમા જ્યા આખાયા વિસ્તારા લોક યોકા વોરહાથી તિયારી

ઓઅલા હેતા, એને તુમહે ઉત્સાહાય એને બોજ જાંણાહાનબી મોદાત કોઅરાહાટી ઉત્સાહી કોઅયા.

3 બાકી માયે યા વિસ્વાસી બાહાહાલ યાહાટી દોવાડયાહા, કા આમહાય જીં વાહવા તુમહે બારામાય પ્રગટ કોઅયોહો, ય્યા યે વાતમાય નોકામ્યા નાંય ઠોરે, બાકી જેહેકોય માયે આખ્યાં, તેહેકેનુજ યેરૂસાલેમમાય વિસ્વાસ્યાહાન પોયહા દાં તુમા તિયાર રા.

4 એહેકોય નાંય ઓઅ, કા જો મોકોદુનિયા કોલહાક વિસ્વાસ્યા મા હાતે યેય, એને તુમહાન પોયહા દાંહાટી તિયાર નાંય દેખાય, તે આમહાન તુમહેવોય ખાત્રી કોઅનામાય લાજવાયા પોડે, બાકી તુમહાન તે યા કોઅતાબી વોદારે લાજવાયા પોડરી.

5 યાહાટી માયે યા વિસ્વાસી બાહાહાલ ઈ વિનાંતી કોઅના જરૂયે હોમજ્યા કા ય્યા પેલ્લેથીજ તુમહેપાય જાય, એને ય્યા દાનાલ તિયાર કોઅય થોવે, જ્યાલ તુમહાય ઉદારતાથી દેઅના વાયદો કોઅયેલ, તે કંજુસાયથી નાંય બાકી રાજીખુશીકોય તિયાર રા.

હારાં દાન દેનારા

6 યે વાતે દિયાન રાખે, કા જીં વોછા પોઅહે, તી વોછા વાડી, એને જીં વોદારે પોઅહે, તી વદારે વાડી.

7 જ્યે કાદે જેહેકોય મોનામાય ઠોરવ્યાહાં, તેહેકોયનુજ દાન દેય, તો નાંય કારકુરથી નાંય દબાણથી દાન દેય, કાહાકા “પોરમેહેર ખુશીથી દેનારાવોય પ્રેમ કોઅહે.”

8 પોરમેહેર બોદાજ પ્રકારા બોરકાત તુમહાન જરુરતથી વોદારે દેય, જ્યેથી બોદીજ વાતમાય એને બોદેજ વેળે, તુમહાન કોઅહીજ વાતની કમી નાંય રોય, બાકી હર ચોક હારાં કામાહાટી તુમા દેય હોકહા.

9 જેહેકેન પવિત્રશાસ્ત્રમાય લોખલાં હેય, “પોરમેહેરાય જરુરી વાળહાન ઉદારતાથી દેનહા, ય્યા ન્યાયપણા કાયામ બોની રોહે.”

10 પોઅનારાલ બિયારો એને ખાંહાટી ખોરાક દેનારો પોરમેહેર તુમહાન જ્યા બિયારા જરુર હેય તી બોદા પુરાં પાડી, એને ય્યાલ વોદાડી, જ્યાથી તુમહે ન્યાયપણા ફળ બોજ ઓઅરી.

11 યે રીતે તુમા બોદેજ જાત્યે મિલકાતથી ભરપુરી ઓઇન ઉદારતા દેખાડાં સમર્થ ઓઅહા, એને જોવે આમા જરુર પોડતા લોકહાન, તુમહે દાન દાહું, તે ચ્યા લોક પોરમેહેરાલ ધન્યવાદ દેઅરી.

12 કાહાકા યે સેવાયેથી નાંચ કેવળ પવિત્ર લોકહા ગોરાજ પુરી ઓઅહે, બાકી બોજ લોક પોરમેહેરાલ ધન્યવાદ દાંહાટી પ્રેષિતબી રોતહા.

13 કાહાકા યે દેયના સેવાયેથી ચ્યે જાઅરી કા તુમા લોક હાચ્યાં હેતા એને ચ્યે પોરમેહેરા મહિમા કોઅરી, કા તુમહાય ખ્રિસ્તા હારી ખોબારેલ બોરહાહાતે માની લેદા એને ચ્યા આગના પાળતાહા, એને તુમા ગોરીબ વિસ્વાસ્યા એને બોદહા ઉદારતાહાતે મોદાત કોઅતાહા.

14 ચ્યે તુમહેહાટી પોરમેહેરાલ પ્રાર્થના કોઅરી, ચ્યે તુમહાલ પ્રેમ કોઅતેહે, કાહાકા ચ્યે જાંઅતેહે કા પોરમેહેરે તુમહેવોચ કોલહી સદા મોયા કોઅયીહી.

15 યા, આપા પોરમેહેરાલ ચ્યા મહાન દાનાહાટી ધન્યવાદ દા, જી કાદાબી માઅહું પોતાના શબ્દાથી પુરીરીતેથી વર્ણન નાંચ કોઅય હોકે જી ચ્યાય આપહાન દેનહા.

10

આત્મિક લોડાઈ

1 આંચ તોજ પાઉલ જો તુમહે હામ્મે બોલવાથી બિઅતાહાવ, બાકી તુમહેથી દુર રોવાથી ઇમાતવાળો બોની જાતહાવ, તુમહાન ખ્રિસ્તા નમ્રતા, એને કોમળતા લીદે વિનાંતી કોઅય રિયહો.

2 આંચ ઈ વિનાંતી કોઅતાહાંવ, કા જોવે આંચ તુમહેપાય યાંવ તે માન કોઠોરતા દેખાડાં નાંચ પોડે. કાહાકા માન ખાત્રી હેય કા આંચ ઓહડા લોકહાઆરે કોઠોરતા દેખાડીન વેવહાર કોઅહું.

3 ભલે આમા યા દુનિયામાય રોજહે, બાકી આમા આમહે દુશ્માનાહા હાતે નાંચ જુલાજે જેહેકેન કા યા દુનિયા લોક જુલાતાહા.

4 જ્યા આથ્યારાહાથી આમા જુલાજેહે, ચ્યે દુનિયાદારી આથ્યાર નાંચ હેય, બાકી પોરમેહેરા શક્તીવાન આથ્યાર હેય, જ્યે કિલ્લાહાન તોડી પાડતેહે.

5 યાથી આમા હર ચોક વિરોધાલ, ચ્યા હર ચોક મોઠયો-મોઠયો વાતો કોઅનારાલ, જું પોરમેહેરા જ્ઞાના વિરુદ્ધ માથાં ઉઠાવેહે, તોડી પાડજેહે એને હર ચોક વાદવિવાદ કોઅનારાલ ખ્રિસ્તા આગના પાળનારો બોનાડી દેજેહે.

6 એને જોવે તુમા પુરીરીતેથી ખ્રિસ્તા આગના પાળનારે ઓઅય જાય, પાછે આમા બોદી આગના નાંચ પાળનારાહાલ શિક્ષા દાંહાટી તિયાર હેય.

પાઉલા ઓદિકાર

7 તુમા કેવળ જું હામ્મે હેય, ચ્યા ચ્યે વાતહેલુજ એઅતાહા. ઓહડયે જો કાદાલ પોતાના બારામાય ઓ બોરહો હેય કા આંચ ખ્રિસ્તા હેય તે ઇબી જાંઆય લા કા જેહેકેન તો ખ્રિસ્તા હેય, તેહેકોયનુજ આમા બી ખ્રિસ્તા હેય.

8 જો આંચ ચ્યા ઓદિકારા બારામાય કાય વોદારે વાહવા કોઅતાહાંવ, જું પ્રભુય માન તુમહે બોરહાલ મજબુત કોઅરાહાટી દેનહા નાંચ કા તુમહે બોરહાલ નાશ કોઅરાહાટી, તે માન ચે વાતે કાય લાજ નાંચ હેય.

9 ઈ આંચ યાહાટી આખતાહાવ, કાહાકા આંચ નાંચ વિચારુ કા તુમહાન ઈ ખોબાર પોડે કા આંચ તુમહાન બિયાડના મોતલાબથી ઈ પત્ર લોખી રિયહો.

10 કાહાકા કોલહાક લોક આખતાહા, “ચ્યા પત્રે તે કડાક એને પ્રભાવશાળી હેય, બાકી જોવે એઅજેહે, તે ચ્યા શરીર નોબળા હેય એને ચ્યા બોલ્યેમાય દમ નાંચ.”

11 યાહાટી જો એહેકેન આખહે, કા ચ્યા લોક ઈ યાદ રાખે, કા જેહેકેન બોઅડા પાછાડી પત્રાહામાય આમહે વચન હેય, તેહેકેનુજ તુમહે હામ્મે આમહે કામેબી રોઅરી.

પાઉલા ઓદિકારા હિવાડા

12 કાહાકા આમહાન ઈ ઈમાત નાંચ કા આમા પોત પોતાનાલ ચ્યાહા હાતે ગોણજે, ચ્યાહાન આપહામાય મેળાવતે, જ્યે પોતે વાહવા કોઅતેહે, એને પોતપોતાને મોજમાપ કોઇન ચોકબિજાથી તુલના કોઇન મૂર્ખ ઠોરતેહે.

13 આમા તે ચ્યા કામહા હિવેથી બારે જું પોરમેહેરે આમહાન દેનહા, વાહવા કોદહીજ નાંચ કોઅજે, બાકી ચ્યે હિવહે આંદારુજ જું પોરમેહેરે

આમહેહાટી ઠોરાવી દેનહી, એને ચ્યેમાય તુમાબી ચેય ગીયહ્ એને ચ્યા ઇસાબે વાહવા કોઅહુ.

14 કાહાકા આમા પોતાની હિવ નાંચ વંડાળજે જાણો આમા તાં લોગુ પોઅચ્યાહાજ નાંચ, જાં ચે સમચે તુમા હેય કાહાકા આમહાયજ બોદહા પેલ્લા તુમહે વોચમાય ખ્રિસ્તા હારી ખોબારે પ્રચાર કોઅચેલ.

15 એને આમા હિવે બારે બીજહા મેઅનાતે વોચ વાહવા નાંચ કોઅજે, બાકી આમહાન આશા હેય કા જેહે-જેહે તુમહે બોરહો વોદતો જાય તેહે-તેહે આમા પોતાની હિવે નુસાર તુમહે લીદે આજુબી કામ વોદાહતા જાહું,

16 કા આમા તુમહે હિવે કોઅતા દુર-દુર વિસ્તારાહામાયબી હારી ખોબારે પ્રચાર કોઅજે, એને ઈ નાંચ, કા આમા બીજહા હિવે આંદાર પેલ્લાજ ઓઅલા કામહાવોચ વાહવા કોઅજે.

17 બાકી જેહેકેન પવિત્રશાસ્ત્રમાય લોખલાં હેય, “જો કાદો વાહવા કોઅરા માગે, તે તો પ્રભુમાંચ વાહવા કોઅે.”

18 કાહાકા જો પોતે વાહવા કોઅહે, તો નાંચ, બાકી જ્યા વાહવા પ્રભુ કોઅહે, તોજ પ્રભુ નોજરેમાય હારો હેય.

11

ચ્યાહા બોરહા બારામાય ચિંતા

1 જો તુમા મા વાયજ મુખાંચિ સહન કોઅચ લેતા તે કાય હારાં ઓઅતા, હાં, મા સહનબી કોઅચ લા.

2 કાહાકા જેહેકેન પોરમેહેર કોઅહે આંચ તુમહાન પ્રેમ કોઅતાહાંવ એને આંચ તુમહે કાળજી કોઅતાહાંવ, યાહાટી માયે તુમહે ચોકમાત્ર વોવડો ખ્રિસ્તાઆરે તુમહે હોગાઇ નોક્કી કોઅચીહી, જ્યેલ આંચ તુમહાન પવિત્ર કુવાર્યે હારકા ચ્યા હામ્મે હોઅપી દાવ.

3 બાકી આંચ બિઅતાહાવ કા જેહેકેન સૈતાનાય હાપા હારકા પોતાના ચતુરાયથી પેલ્લી થેએ હવ્વાયેલ છેતરી, તેહેકેનુજ તુમહે મોન નિખાલસ એને પવિત્રતાથી જીં ખ્રિસ્તાહાતે રા જોજે કાય નાશ નાંચ કોઅલે જાય.

4 કાહાકા જોવે કાદાં માઅહું તુમહેપાય ચેયન, કાદા બિજા ઈસુ પ્રચાર કોઅહે, જ્યા પ્રચાર આમહાય નાંચ કોઅચો કા કાદો બિજો આત્મા

મિળહે, જો પેલ્લો નાંચ મિળલો આતો, કા આજુ કાદો આલાગ હારી ખોબાર ગ્રહણ કોઅહે જ્યાલ પેલ્લા તુમા નાંચ વોનાલા આતા, તે તુમા ચાલ બોજ ખુશીથી માની લેતહા.

પાઉલ એને જુઠા પ્રેષિત

⁵ આંચ તે પોતે-પોતાલ કોઅયેહેબી વાતમાય મોઠામાય મોઠા પ્રેષિતાહા કોઅતો વોછો નાંચ માનુ.

⁶ જાણે કા આંચ બોલવામાય ઉશાર નાંચ હેતાંવ, બાકી નોકીજ જ્ઞાનમાય આંચ વોછો નાંચ, એને યા સાબિતી આમા બોદયે રીતેથી એને બોદયે જાત્યે વાતહેમાય તુમહાન દેય ચુક્યાહા.

⁷ માયે તુમહાન પોરમેહેરા હારી ખોબાર મોફાતમાય વોનાડી, એને પોતે પોતાનાલ નિચો કોઅયો, એટલે તુમા ઉચા ઓઅય જાય, તો કાય માયે ઓહડા કોઅવાથી ખોટાં કોઅયાહાં?

⁸ માયે તુમહે સેવા કોઅરાહાટી બીજી મંડવ્યેહેથી પોયહા લેદા, તુમા ચ્યાલ લુટનાં મા આખહા.

⁹ એને જોવે તુમહેઆરે આતો, એને માન પોયહા જરુર પોડી, તે આંચ તુમહેમાઅને કાદાવોય વોજો નાંચ બોન્યો, કાહાકા વિસ્વાસી બાહાહાય, મોકોદુનિયા વિસ્તારામાઅને યેયન મા જરુરાત પુરી કોઅયી, એને માયે બોદયે વાતમાય પોતે પોતાલ તુમહાવોય વોજો બોનનાથી રોક્યો, એને રોકી રોહી.

¹⁰ જેહેકેન કા નોકીજ રીતે ખ્રિસ્તા હાચ્યાઇ માંયેમાય હેય, યાહાટી પુરા આખાયા વિસ્તારામાય કાદો માન યે વાતવોય વાહવા કોઅનાથી નાંચ રોકી કા માયે કાદાપાઅને પોયહા નાંચ લેદા.

¹¹ માયે તુમહેપાઅને પોયહા કાહાનાય લેદા? કાય માયે એહેકેન યાહાટી કોઅયા કાહાકા આંચ તુમહાન પ્રેમ નાંચ કોઅઉ? પોરમેહેર જાંઅહે કા આંચ તુમહાન કોલહો પ્રેમ કોઅતાહાંવ.

¹² બાકી જીં આંચ કોઅતો યેય રિયહો, તીજ કોઅતો રોહી, એટલે ચ્યા માઅહાન યે વાતવોય વાહવા કોઅના મોકો નાંચ દાવ, કા ચ્યે બી તીજ કામ કોઅય રીયહે જીં આમા કોઅય રીયહા.

¹³ કાહાકા ઓહડા લોક જુઠા પ્રેષિત એને કપટથી કામ કોઅનારા, એને ખ્રિસ્તા પ્રેષિત ઓઅના જુઠો વેહે કોઅતાહા.

14 એને ઈ કાય નોવાયે વાત નાંચ ફાહાફા સૈતાન પોતેબી પોરમેહેરા મહિમાવાળી હોરગા દૂતા રુપ લેયને દોગી દેહે.

15 યાહાટી જો ય્યા સેવાકબી ન્યાયપણા સેવાક ઓઅના ડોંગ કોએ, તે યામાય કાય મોઠી વાત નાંચ હેય, ય્યાહા છેવાટ ય્યાહા કામહાનુસાર ઓઅરી.

ખ્રિસ્તાહાટી દુઃખ વેઠના

16 આંચ પાછો આખતાહાવ, કાદો માન મૂર્ખ નાંચ હોમજે બાકી જો તુમહાય માન એહેકેન માનીજ લેદહા તે માન મૂર્ખા હારકા માની લા. યાથી માન બી વાહવા કોઅના મોકો મિળી જાય.

17 યા બારામાય જી કાય આંચ આખતાહાવ, તી પ્રભુ આગનાયેનુસાર નાંચ બાકી મૂર્ખતાથીજ આખતાહાવ.

18 જોવેકા બોજ લોક યા દુનિયા લોકહા હારકા અભિમાન કોઅતાહા, તે આંચબી અભિમાન કોઅહી.

19 તુમા તે હોમાજદાર બોનીન આનંદથી મૂર્ખા સહન કોઅતાહા.

20 જોવે તુમહાન કાદો ગુલામ બોનાવી લેહે, કા તુમહેપાય જી કાય હેય તી તો લેય લેહે, કા તુમહે ફાયદો ઉઠાવેહે, કા પોતે પોતાલ તુમહેથી મોઠો બોનાડેહે, કા તુમહે મુંચાવોય થાપાડ ઠોકહે, તે તુમા વેઠી લેતહા.

21 આંચ લાજથી માની લેતહાવ, કા તુમહેઆરે ઓહડો વેવહાર કોઅરા માન ઈમાત નાંચ ઓઅચી. તુમા ચેલ મા નોબળાય હોમજ્યા, બાકી જ્યે વાતહેબારામાય ય્યા લોક વાહવા કોઅના ઈમાત કોઅતાહા, આંચબી ચ્યે વાતહેબારામાય તેહેજ કોઅચ હોકહુ.

22 કાય ય્યાબી હિબ્રુ હેય? આંચબી હેય, કાય ય્યાબી ઈસરાયેલી હેય? આંચબી હેય, કાય ય્યાબી આબ્રાહામા પેડ્યેમાઅને હેય? આંચબી હેય.

23 કાય ય્યાબી ખ્રિસ્તા સેવાક હેય? આંચ ગાંડા માઅહા હારકો આખતાહાવ, આંચ ય્યાહાથી વોદારી હેતાંવ, માયે એલાહાથી વોદારે મેઅનાત કોઅચીહી, એલાહાથી વોદારે જેલેમાય ગીયહો, બોજદા ચાપકાહાકોય માર ખાદહો, મા જીવ ફાંદામાય ચેય પોડયો.

24 પાય વોખાત માયે યહૂદી ગુરુવાહા આથાકોય ઓગણચાળીસ-ઓગણચાળીસ ચાપકા માર ખાદો.

25 ત્રીન વોખાત માયે હોટયેહેથી માર ખાદો, ચોક વોખાત દોગડાહા માર ખાદો, ત્રીન વોખાત જાહાજ ટુટી ગીયા, એને ચોક રાત એને ચોક દિહી આંચ દોરિયામાય પોડી રિયો.

26 માન ગેડી-ગેડી મુસાફીરી કોઅરા પોડી, કોદહી નોયહેમાઅને મુશીબાત, કોદહી બાંડહા મુશીબાત, કોદહી પોતાના જાતલાહા, કોદહી ગેર યહૂદીયાહાથી મુશીબાત, કોદહી શેહેરાહામાઅને મુશીબાત, કોદહી ઉજાડ જાગામાય મુશીબાત, કોદહી દોરિયા મુશીબાત વેઠયાં, એને કોદહી જુઠા વિસ્વાસ્યાહા મુશીબાતે સામનો કોઅરા પોડયો.

27 માયે કોલહ્યોક રાતો ઉજાગરો રોયન કાડયો, માન ખાઅના નાંચ મિથ્યાં, યાહાટી માયે બુખો-પિહો રોયન, હીયાળામાય એને વોછે ફાડકે આતે તેરુંબી બોજ મેઅનાત કોઅચી એને બોજ બોદી મુશીબાતો વેઠાં પોડયો.

28 એને બિજ્યે બોદયે વાતહે સિવાય જ્યેહે વર્ણન આંચ નાંચ કોઅઉ બોદયે મંડવ્યેહે ચિંતા દિનેરોજ માન દાબાણ કોઅત્યોહો.

29 જોવે કાદો નોબળો ઓઅહે, તે આંચબી નોબળાયે અનુભવ કોઅહુ, જોવે કાદો પાપમાય પોડે, તે મા મોન દુઃખી ઓઅચ જાહાય.

30 જોવે મા વાહવા કોઅના ગોરાજ હેય, તે આંચ મા નોબળાયેમાય વાહવા કોઅહી.

31 પોરમેહેર આમે પ્રભુ ઈસુ ખ્રિસ્તા આબહો કાયામ ધન્ય હેય, જાંઅહે, કા આંચ જુઠો નાંચ બોલું.

32 દમસ્ક શેહેરામાય આરેત્સ રાજા રાજ્યપાલે માન દોઅરાંહાટી દમસ્ક શેહેરાવોય રાખવાળ્યા ગોઠવી દેના.

33 બાકી હાંગાત્યાહાય ટોપલ્યેઆરે લાંબા દોઅડા બાંદિન, ચ્યામાય માન બોહાડીન, કોટાવોઅને ચોક્યે બાર્યેમાઅને નિચે ઉતાડી દેનો, એને ચે રીતે આંચ રાજ્યપાલથી બોચી ગીયો.

12

પાઉલાલ દર્શન

1 જો વાહવા કોઅના માયેહાટી ઠીક નાંચ, તેરુંબી માન કોઅરા પોડહે, બાકી આંચ પ્રભુવા દેનલા દર્શન એને પ્રગટીકરણ વાતો કોઅહી.

2-3 આંય ખ્રિસ્તમાય ચોકા માઅહાલ જાંઅતાહાંવ, જો ચૌવુદ વોરહા પેલ્લા બોદહાથી ઉચા હોરગા હુદી ઉચે ઉઠાવી લેવાયો. માન નાંય ખોબાર કા તો પોતાના શરીરામાય આતો, કા પાછે તો કેવળ પોતાના આત્માહાતે તાં આતો, કેવળ પોરમેહેર જાંઅહે. આંય ચોક વાત પાછો આખતાહાવ, આંય ચ્યા માઅહાન જાંઅતાહાંવ તો પોતાના શરીરમાય આતો, કા તો કેવળ પોતાના આત્માહાતે આતો, કેવળ પોરમેહેર જાંઅહે.

4 ચ્યા માઅહાલ હોરગામાય ઉઠાવી લેદો તાં ઓહડચે વાતહે ચર્ચા વોનાયો, જ્યો અકથનીય હેય એને જ્યેહેલ આખના કાદા માઅહાલ પરવાનગી નાંય હેય.

5 ઓહડા માઅહાવોય તે આંય વાહવા કોઅહી, બાકી પોતાનાવોય પોતાની કમજોર્યેહેલ છોડીન, પોતાના બારામાય આંય વાહવા નાંય કોઅઉ.

6 કાહાકા જો આંય વાહવા કોઅના જાંઉબી તે મૂર્ખ નાંય હેય, કાહાકા હાચ્યાં બોલહી, બાકી આંય ઈ નાંય કોઅહી, કાહાકા એહેકેન નાંય ઓએ, કા જેહેકેન માન જો કાદો એઅહે, તો માન ચ્યાથી વોદારે હુમજે.

શરીરામાય કાટો

7 આંય ચ્યા અદભુત પ્રગટીકરણાવોય વાહવા નાંય કોઅઉ જું પોરમેહેરે માન દેખાડયાહા, યાહાટી મા શરીરામાય ચોક કાટો ડોચ્યહો. માન દુઃખ દેતા રાંહાટી એટલે સૈતાના ચોક દૂત માન મિળ્યહો, કા આંય વાહવા નાંય કોઅઉ.

8 ચા બારામાય માયે પ્રભુલ તીન વોખાત વિનાંતી કોઅયી, કા માંયેથી ઈ દુઃખ દુર ઓઅય જાય.

9 એને ચે માન આખ્યાં, “મા સદા મોયા તોહાટી બાસ હેય, કાહાકા મા જું તાકાત કમજોર્યેમાય પુરી ઓઅહે,” યાહાટી આંય બોજ આનંદાકોય મા કમજોર્યેમાય વાહવા કોઅહી, કાહાકા ખ્રિસ્તા સામર્થ માયેવોય ઉતતી રોય.

10 ચા લીદે આંય ખ્રિસ્તાહાટી કમજોર્યો, એને નિંદાચેહેમાય, એને ગરીબાયેમાય, એને અત્યાચારમાય, એને સંકટામાય, આનંદિત હેતાંવ, કાહાકા જોવે આંય નોબળો ઓઅહું, તોવેજ આંય ખ્રિસ્તા સામર્થમાય બળવાન હેતાંવ.

ચોક પ્રેષિતા ગુણ

11 આંય મૂર્ખ આતો, બાકી ઈ તુમાંજ હેય, જ્યાહાય માન ચે રીતે મજબુર કોઅયા, તુમહાય તે મા વાહવા કોઅરા જોજતાં, કાહાકા જરી આંય કાયજ નાંય હેતાંવ, તેરુંબી આંય ચ્યા મોઠા થી મોઠા પ્રેષિતાહાથી કોઅયેહેબી વાતમાય ઓછો નાંય હેતાંવ.

12 હાચ્યાં પ્રેષિતા ગુણબી તુમહે વોચમાય બોદાજ જાત્યા ધીરજ હાતે ચિન્હે, એને નોવાયે કામે, એને સામથ્યા કામાહાકોય દેખાડયે.

13 ભલે તુમા કોઅયેહે વાતમાય બિજયે મંડળ્યેહે કોઅતે વોસે રાહા, સિવાય ચામાય કા આંય તુમાહાવોય આર્થિક વોજો નાંય બોન્યો, જો તુમા ઓહડા વિચારતેહે માયે ઓહડા કોઈન તુમહેહાતે અન્યાય કોઅયોહો, તે તુમહે ઓહડા વિચારના ગલત હેય. તુમા માન માફ કોઅય દા.

મંડળીહાટી પ્રેમ

14 આમી, આંય તીજી વોખાત તુમહેપાય યાહાટી તિયાર હેય, એને આંય પાછી તુમહાવોય વોજો નાંય બોનહી, કાહાકા આંય તુમહે મિલકાત નાંય, બાકી તુમહાન આંય વિચારતાહાવ, કાહાકા પાહાહાય આયહે આબહા હાટી મિલકાત મેળવા નાંય જોજે, બાકી આયહે આબહાય પાહાહા હાટી મિલકાત મેળવા જોજે.

15 આંય બોજ આનંદથી તુમહેહાટી પોતાના બોદાંજ કાય તુમહાન દેય દિહી ઓલે લોગુ કા પોતેજ પોતાનો જીવ દાંહાટી તિયાર હેતાંવ, આંય તુમહાન બોજ પ્રેમ કોઅતાહાંવ, બાકી માન ઓહડા લાગહે કા તુમા માન ઓછો પ્રેમ કોઅતાહા.

16 કાયબી ઓએ, આંય તુમહાવોય વોજો નાંય બોન્યો, બાકી બીજહાન લાગહે કા આંય ઉશારી હેતાંવ એને તુમહાન પુરો દોગો દેનહો, જો કા ચોક જુઠા હેય.

17 તુમાંજ દેખાડા, ઠીક જ્યાહાલ માયે તુમહાપાય દોવાડયા, કાય માયે ચ્યાહામાઅને કાદાથી ફાયદો ઉઠાવ્યો?

18 માયે તીતુસાલ હોમજાડીન ચ્યાઆરે ચ્યા વિસ્વાસી બાહાલ દોવાડયો, તે કાય તીતુસાયં તુમહાન બોળા પાડીન તુમહાપાયને કાય

ફાયદો ઉઠાવ્યો? કાય આમે યોકુજ લક્ષ નાંચ આતાં? કાય આમહાય યોકુજ રીતેથી કામ નાંચ કોઅયા?

¹⁹ તુમા આમી હુદી હોમજી રિયા ઓરી કા આમા તુમહે હામ્મે જવાબ દેય રીયહા, બાકી, ઓ પ્રિય બાહા એને બોઅયેહેય, આમા તે પોરમેહેરા હામ્મે ખ્રિસ્તામાય તુમહે બોરહામાય વોદનાહાટી બોધો વાતો આખજેહે.

²⁰ કાહાકા માન બિક હેય, કાય એહેકેન નાંચ ઓએ, કા આંચ યેયન જેહેકેન એઅરા માગુ, તેહેકોય તુમા નાંચ દેખાય, એને માન બી તુમા નાંચ એઅરા માગેત તેહેકેનુજ એએ. કા તુમહેમાય જુલાના, આડાઇ, રોગ, વિરુદ્ધ, રોગવાના, યુગલી, અભિમાન એને ધાંદલ, ઈ નાંચ રોય.

²¹ એને કાય એહેકેન નાંચ ઓએ કા જોવે આંચ તુમહાન પાછો મિળાં યાંવ, મા પોરમેહેર માન અપમાન કોએ એને માન ઘોણા જાંઅહા હાટી પાછા શોક કોઅરા પોડે, જ્યાહાય પેલ્લા પાપ કોઅયેલ એને ચ્યાહાય ખારાબ કામ, વ્યબિચાર, એને લુચ્યાઈ કોઅના બંદ નાંચ કોઅયા ઓરી.

13

છેલ્લી ચેતાવણી

¹⁻² પવિત્રશાસ્ત્રમાય એહેકેન લોખલાં હેય કા, “દરેક મામલામાય બેન કા ત્રીન સાક્ષીદારાહા સાક્ષીથી સાબિતી કોઅલા જાં જોજે.” જોવે આંચ બીજી વોખાત તુમહેપાય યેનેલ, તે માયે ચ્યા લોકહાન ચેતાવણી દેનેલ, જ્યાહાય પાપ કોઅયેલ. આમી યા પત્રામાય, આંચ પાછી ચ્યાહાન એને બિજા બોદા લોકહાન ચેતાવણી દેતહાવ, આમી આંચ તુમહેપાય ત્રીજી વોખાત યેનારો હેતાંવ, જો ચ્યાહાય આમીબી પાપ કોઅના બંદ નાંચ કોઅયા તે કોઅહાબી ન્યાય કોઅનાથી નાંચ છોડું.

³ આંચ યાહાટી આખતાહાવ, કાહાકા તુમા સાબિતી હોદતાહા, કા જો માયેથી વાત કોઅહે, બોલહે તો ખ્રિસ્ત હેય, જોવે તુમહાલ હુદરાવેહે તે તો તુમહેહાટી નોબળો નાંચ, બાકી તુમહેમાય સામર્થી હેય.

⁴ તો નોબળાયે લીદે હુળીખાંબાવોય ચોડવી તે દેનો, તેરુંબી પોરમેહેરા સામર્થ્યા થી જીવતો હેય, આમા બી તે નોબળા હેય જેહેકેન ખ્રિસ્ત આતો, બાકી તેરુંબી તુમહેહાટી પોરમેહેરા સામર્થ્યા થી આમા ચ્યાઆરે જીવતા રોડું.

5 ઈ એઅરાહાટી તુમા પોતપોતાને પારખા, કા તુમહે બોરહો હાચ્યો હેય કા નાંય, પોતપોતાને પારખા, કાય તુમા પોતાના બારામાય ઈ નાંય જાંએત, કા ઈસુ ખ્રિસ્ત તુમહેમાય હેય? જો નાંય તે તુમા લોક નોકામ્યા નિંગ્યહા.

6 બાકી મા આશા હેય કા તુમા જાંઆઈ લાહા, કા આમા નોકામ્યા નાંય નિંગ્યહા.

7 એને આમા આમહે પોરમેહેરાલ ઓહડી પ્રાર્થના કોઅજેહે, કા તુમા કાય ખોટાં નાંય કોએ, યાહાટી નાંય કા આમા હારે દેખાજે, બાકી યાહાટી કા તુમા તીંજ કોઆ, જું હારાં હેય, પાછે ભલે આમા અસફળ ઓઅજે બાકી આમા વિચારજેહે કા તુમા લોક હારાં કામ કોએ.

8 કાહાકા આમા હાચ્યાયે વિરુદ્ધમાય કાય નાંય કોઈ હોકજે, બાકી હાચ્યાયે હાટીજ કોઅજેહે.

9 જોવે આમા નોબળા હેય, એને તુમા લોક બોરહામાય બળવાન હેય, તોવે આમા આનંદમાય રોજહે, એને ઈ પ્રાર્થનાબી કોઅજેહે, કા તુમા લોક બોરહામાય સિદ્ધ ઓઅઈ જાયા.

10 યાહાટી આંય તુમહેપાય યેઅના પેલ્લા ચો વાતો લોખતાહાવ, એટલે માન પોતાના ઓદિકારાલ ઉપયોગ કોઅના કાય જરુર નાંય પોડે, જું પ્રભુય માન દેનહા. કાહાકા આંય મા પોતાના ઓદિકારા ઉપયોગ તુમહે બોરહાલ મજબુત કોઅરાહાટી કોઅરા માગતાહાવ નાંય કા નાશ કોઅરાહાટી.

સલામ એને બોરકાત

11 આમી, ઓ બાહાહાય એને બોઅયેહેય, આનંદામાય રા, સિદ્ધ ઓઅતા જાયા, ચોકબિજાલ ઈમાત દા, ચોકાજ વિચારા બોના, મિળીન રા, એને પ્રેમ એને શાંતીદાતા પોરમેહેર તુમહેઆરે રોઅરી.

12 ચોકબિજાલ પવિત્ર ગુળા દેયને સલામ કોઅયા.

13 ઈસુ ખ્રિસ્તા બોદાજ પવિત્ર લોક તુમહાન સલામ આખતેહે.

14 પ્રભુ ઈસુ ખ્રિસ્તા સદા મોયા એને પોરમેહેરા પ્રેમ એને પવિત્ર આત્મા સંગતી તુમહે બોદહાઆરે ઓઅતી રોય.

xxx

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d